

Verum, quod caput est, in eo insistit vehementer S. Doctor, quod abolitus sit a Christo libellus repudii. Porro certum est, per libellum repudii dirimi coniugium, ac ita dirimi, ut posset dimissa alteri se iungere foedere coniugali; si igitur iuxta S. Chrysostomum haec uxorem dimittendi, seu clarior adhuc, haec ita dirimendi coniugia facultas per Christum abolita est, aperte consequitur matrimonii christiani vinculum iugiter, etiam interveniente adulterio, perseverare. Hoc argumentum validius adhuc est adversus eos, qui contendunt a Moïse per *foeditatem* adulterii flagitium fuisse significatum.

Nec obstat Chrysostomum de viris tantum fuisse locutum; siquidem certum est, ipsum quoad ius matrimoniale parem utrumque coniugem agnovisse, ut inter caetera pateficiant quae scribit Hom. XIX. in I. Cor VII. « Alibi certe magnam » dat marito praerogativam et in novo et in veteri Testa- » mento dicens: *Ad virum tuum conversio tua, et ipse tibi do- » minabitur.* Paulus vero sic dividens et scribens: *Viri diligite » uxores, uxor autem timeat virum.* Hic vero non ultra maius » aut minus ponit; sed unam potestatem. Quare? Quia de » castitate sermo ipsi erat. In aliis quidem praerogativam, in- » quis, habeat maritus; ubi autem de continentia agitur, non » item. *Vir potestatem sui corporis non habet, neque uxor.* » Multa est aequalitas, et nulla praerogativa (137).

Multo vero minus adversarii S. Io. Chrysostomum sibi favere arbitrari possunt, quod in cit. serm. *De libello repudii* scripsit: « Nam si is, qui mortui coniugis, cuius uxorem accepit, » imaginem recumbentem viderit, afficitur aliquo modo, et » graviter fert; ac si viventem maritum videat eius, quae sibi » cohabitat (138), qualem vitam aget? Quo pacto ingredietur

(137) N. 1. ed. Maur. tom. X. pag. 439 seq.

(138) Ad clariorem huius loci intelligentiam, animadvertisendum est, quod ea, quae hic dicit S. Io. Chrysostomus de defuncti viri imagine, allata sint similitudinis gratia; ut animi sensa exprimat illius, qui viderit mulierem a se dimissam ob adulterium, in alterius potestatem venisse.

» domum? Quo animo, quibus oculis videbit illius uxorem » suam? Imo neque illius, neque suam iuste quis tam appellat: *adultera enim nullius est uxor* (139). » Ex quibus postremis verbis concludunt, iuxta S. Doctorem, reum quidem illum fieri, qui uxorem praeter causam fornicationis dimiserit; contra vero si hac de causa eam repudiaverit, immunem esse prorsus a crimine, etsi aliam duxerit, quia id Dominus fieri posse hoc in casu edixit. Verum si expendamus orationis seriem, patebit, ideo S. Ioannem Chrysostom. mulierem adulteram nullius uxorem dixisse, quod nec prioris proprie sit uxor, qui eam dimisit, nec alterius, qui post illam dimissionem adulterii causa eamdem duxerit. Non prioris, quia eam a se repulit, neque amplius uti uxorem agnoscit, aut cum ea cohabitare sustinet; non alterius, quia iuxta christianam legem, qui dimissam, vivente adhuc dimittente, duxerit, moechatur. Atque ita fit, ut neutrius sit uxor, non unius *de facto*, non alterius *de iure*.

Quin potius ex his verbis novum exurgit argumentum pro genuina S. Chrysostomi sententia de absoluta indissolubilitate coniugii etiam in casu adulterii. Si enim ipse arbitratus esset, propter adulterium vinculum coniugale reipsa dirimi, nunquam dixisset mulierem adulteram a priore dimissam non esse alterius legitimam uxorem; soluto quippe matrimonio, mulier libera est, et qui eam dicit, legitime dicit. At hoc inficiatur S. Chrysostomus; imo docet eam esse *adulteram et adulterum illum*, qui eam duxerit. Censuit itaque, et in hoc casu vinculum coniugale integrum permanere. Qua propter concludebat post obiecta verba: » Fefellit pacta, quae cum illo habuit, et *ad te cum honestis legi- » bus non venit.*

### §. XVI.

De Theodoreto.

Nec dissentit a Io. Chrysostomo Theodoreetus in omnimoda vinculi coniugalnis asserenda firmitate etiam interveniente adul-

(139) Loc. cit. ex tom. III. n. 3. pag. 207.

terio , quamvis adversarii eum pro causa sua adducere non vereantur. Sane tria a Launoio ex eo proferuntur , quibus suadeat, episcopum Cyrensem, quem merito doctum atque in Scripturis exercitatissimum vocat , suae sententiae adstipulari : sunt autem :

I. Ex lib. V. *Haeretic. fabular.* c. XVI. ubi haec leguntur : « Antiqua (lex) eum , qui uxorem odio habebat , dimittere illam iussit ; nova autem adulterium appellat repudium citra fornicationem. Qui enim , inquit , *uxorem suam dimitit* , excepta fornicationis causa , moechari eam facit , et qui dimissam duxerit , moechatur (140). »

II. Ex eiusdem libri cap. XXVI. *De matrimonio* : « Ipse autem Dominus non solum non prohibuit matrimonium , sed et in nuptiis convivatus est , et vinum sine cultura productum nuptiis donum dedit. Legem porro matrimonii adeo confirmavit , ut eum , qui excepta fornicationis causa matrimonium solvere velit , alia lege inhibeat : Quicumque , inquit , *uxorem suam dimitit* , nisi ob fornicationem , facit eam moechari (141). »

III. Ex serm. IX. *De legibus* : « At naturae opifex , quia humana manam creans naturam unum principio virum et foemina unam formavit , etiam solvi matrimonium vetat , unicamque huius dirimendi causam adsignavit eam , quae matralem copulam vere divellit. Omnis enim , ait , qui dimitit uxorem suam , excepta fornicationis causa , facit eam moechari , et qui dimissam duxerit , adulterat. Quibus verbis caetera uxoris vitia ferri iubet , seu loquax sit illa , seu temula , seu convitiosa : sin vero nuptiarum leges transiliat , in aliumque procax intendat , tunc denique copulam solvi iubet (142). »

Quibus Braun alium textum adiecit ex comment. in I. ad Cor.

(140) Op. ed. Paris. 1642. tom. 4. pag. 289.

(141) Ibid. cap. XXV. pag. 308, non autem cap. XXVI. ut allegat Launoius.

(142) Ibid. pag. 619 seq.



VII. ubi scribit : « Statuit hoc loco tantum separationis legem , quam , qui alia quam fornicationis causa discesserunt , coniuges servare debeant (143). »

Haec quidem ipsi. Verumtamen si recte ea dispiciantur , non modo divorci perfecti causae haud favere , sed eidem potius adversari , quae tanto apparatu iactantur Theodoreti testimonia ex illorum analysi sobrios quisquam sibi persuadebit.

Etenim I. Nihil de suo statuens Theodorets , se refert ad Matth. V. 32. et XIX. 9. textus : adeoque tota resolvitur controversia ad intelligentiam textuum Matthei. Iam vero suo loco nos critice et exegetice ostendimus , illos haud intelligi posse de solutione coniugii quoad vinculum , ita ut fas sit post uxoris adulterae ciectionem aliam ducere. Idem proinde dicendum de Theodoreti sententia.

2. Quamvis in allegatis testimoniorum Theodorets aperte loquuntur de *repudio* , de *solutione matrimonii* , de *divulsione copulae coniugalis* , de *diremptione* , quae voces , ut notum est , in usu loquendi Patrum aequi intelligi possunt de dissolutione perfecta ac de imperfecta ; nunquam tamen docet posse virum , citra adulterium , aliam ducere uxorem post eiusmodi repudium , solutionem , divulsionem aut diremptionem. Quod tamen necesse foret , ut is suffragari adversariorum thesi dici deberet.

His animadversis , ad textus Theodoreti expendendos iam accedimus.

Itaque ad primum quod attinet , Theodorets affirmat , novam Legem vocare *adulterium* (144) , repudium citra fornicationem , quatenus adulter efficitur , tum qui citra fornicationis causam uxorem dimitit , tum qui quacumque de causa dimissam ducit , ut patet ex verbis evangelicis ab ipso adductis : et qui dimissam duxerit , moechatur , quae postrema verba Lau-

(143) Ita in cit. Dissert. *De matrim.* qui non verba , sed sensum Theodoreti , ut ipse autumat se retulisse profitetur. Alibi autem prout iacent , retulit Launoios.

(144) Graece enim est ποιησία.

noius omisit ; aut quatenus in causa est vir quod uxor citra fornicationem dimissa , adulteret. Nec tamen exinde sequitur non fore adulterum ex mente Theodoreti, qui in casu fornicationis, adultera dimissa , aliam duxerit, aut qui hac de causa dimissam mulierem duceret. Hoc porro esset ostendendum , quod tamen ex verbis Theodoreti adversarii non efficiunt.

Nec aliud sensum prae se ferre alterum textum liquet ex orationis serie , et ex iis quae postea subiicit. Etenim immediate post allegata verba ita prosequitur Cyrensis praesul : « Deinde, » cum dixissent pharisaei, veterem legem iussisse dari libellum » repudii , interpretatus est (Christus) illis scopum legis. Dixit » enim : *Ob duritiam cordis vestri legem hanc scripsit vobis :* » ab initio autem creationis , masculum et foeminam fecit illos » *Deus. Propter hoc dimit et homo patrem et matrem, et adhae-* » *rebit uxori suae , et erunt duo illi caro una.* Ita cum primam » legisset legem , quam ipse dederat , subiunxit : *Itaque iam* » *non sunt duo. Quod ergo Deus coniunxit, homo non separat.* » Sub finem vero eiusdem capituli proleta Apostoli sententia : *Iis autem, qui matrimonio iuncti sunt etc.* pergit dicens : « Tantum abest , ut prohibeat matrimonium , ut etiam eum, » qui d ssolvit (145) , dominicis legibus cohibeat. Non enim, » ego , inquit , hanc legem scribo , sed Dominus Deus , qui » in evangeliis divinis adiecit , et eam, quae separata fuerit , in- » nuptam manere iussit , hac ratione cogens redire ad vi-

(145) Hac occasione adnoto quanam potestatem voces *dissolvere* , *dirimere* etc. habeant penes antiquos. Certum enim est hic a Theodoreto verbum *dissolvere* , accipi in sensu separationis partialis , seu quoad torum et habitationem. Quod quidem confirmatur alio exemplo, quo sensu veteres quandoque vocem *dissolvere* accipiant, non ad significandam plenam coniugii dissolutionem, sed ad partiale tantum, nimurum ex Patribus concilii Gangrensis, qui in Synodica epist. sua aiunt iuxta veterem versionem : « Unde factum est , ut multae mu- » lieres eos (Eustathianos) secutae , relictis propriis viris , et viri , uxoribus » destituti , *vinculum coniugale dissolvent* , continentiam profitentes , quam » cum retinere non possent , *adulterium commiserunt.* » Iam vero quanam ra- » tione adulterium perpetrare potuissent , si prioris coniugii solutum erat vin-

» rum (146). » Quibus verbis quamecumque coniugalis vinculi solutionem absolute excludit .

In tertio textu, cum afferat integra Salvatoris verba : *Et qui dimissam duxerit, adulterat;* satis ostendit, se non admittere vinculi solutionem; dum vero profert verba illa : ob fornicationem *solti copulam iubet*, aperte innuit se loqui de unica causa intrinseca separationis quoad torum; quod apertius constat ex voce *iubet*, quae indicat obligationem, qua vir tenetur ad dimit- tendam uxorem, quae maneat in adulterio, ne eius delicti se par- ticipem faciat iuxta illud Prov. *Qui tenet adulteram stultus est et impius*, ab antiquis saepe laudatum.

Quod demum omne depellit dubium est textus, quem Braun veritus est integrum adducere, contentus sensum eius evertere, ut illum ad rem suam accommodaret. Itaque in comment. in I. ad Cor. VII. 10. 41. in ea verba : *Iis autem, qui matrimonio iuncti sunt etc.* Theodoretus haec scripsit : « Evangelicam le- » gem revocat in memoriam. Dominus enim in sanctis evan- » gelii dixit : *Quicumque dimittit uxorem praeter quam* » *causa fornicationis, facit eam mochari.* Propterea adiecit, » *Non ego, sed Dominus.* Hoc autem, maneat innupta, vel viro » reconcilietur, non est contrarium illi : *Nolite fraudare invi-* » *cem nisi forte ex consensu.* Illa enim dicta sunt iis, qui non » propter aliam causam, sed propter solam continentiam sepa- » rantur : hic autem iis legem statuit, qui de aliis rebus contendunt. Et conatur quidem infractum servare matrimonii vin- » culum : condescendens autem imbecillitati, ei, qui separatur, » continentiam praecipit, hac etiam ratione prohibens matrimo- » nii disjunctionem. Cum enim alteri coniungi prohibet, utram- » que partem ad prius matrimonium redire compellit (147). » Hic quisque intelligit Theodoreum non modo verba Pauli, ve- » rum etiam ipsius Christi de perfecta indissolubilitate exposuisse, » ita ut de fornicationis causa ne mentionem quidem iniecerit.

culum ? Celebratum est autem hoc concilium circa an. 524. in Paphlagonia. In collec.t. ampliss. concil. Venet. 1735. tom. II. col. 1097.

(146) Ed. cit. pag. 509.

(147) Op. ed. cit. tom. III. pag. 450.

Ut igitur paucis perstringamus, quae de Theodoreto hac super re diximus, ex eo habemus, nunquam ipsum locutum esse de facultate alterius ducendae uxoris, priore etiam propter adulterium dimissa, in quo tamen consistit controversiae cardo; habemus insuper, ipsum ubique summam praedicare coniugalis vinculi firmitatem, atque exinde occasionem cepisse commendandi p[re] Mosaico instituto legem evangelicam (148.)

## §. XVII.

De Asterio Amaseno.

Asterius, Amasae in Ponto episcopus, qui floruit sub finem quarti, aut sub initium sec. V. (149), in *Homil. in locum evan- geli secundum Matth. An liceat homini dimittere uxorem suam*, scribit: «Hoc ratum ac omnino persuasum habete, exceptis morte ac adulterio, nulla ex causa matrimonium dirimi» (150). »

Haec porro verba persuadere videntur, S. Asterium in ea fuisse sententia, quod coniugium adulterio non secus ac morte quoad vinculum dirimatur. Alloquitur enim eos, qui tunc temporis summa facilitate uxoribus nuncium remittebant. Siquidem haec ait: «Qui autem nexus tam arcto iuncti sunt, iam non sunt duo, sed una caro: quod ergo Deus coniunxit homo non separat. Sane quidem haec pharisaeis tunc dicta fuere: ve-

(148) Nimis proinde facilem se praebuit Tournelyus, dum Theodoreto, non secus ac Asterium, de quomox dicturi sumus, adversariis dimisit. Ast Colletus in *Continuacione Tournelyi* in tract. *De matrim.* cap. V. n. 197. et 198. utrumque vindicavit, et quidem iure meritoque.

(149) Bellarminus *De script. eccles.* hunc auctorem retulit, ad an. 400. Eadem assensit Labbeus in *dissert. historica* ad hunc Bellarmini locum. Huius Asterii quinque homiliae omnium primus reperit vulgavitque Rubenus S. I Antwerpiae 1607. Quibus deinde alia eiusdem opera adiecit et vulgavit Cotelerius in op. *Veterum monument.* Paris 1681. tom. II. p. 1. seqq. In quinque illas homil. priores Cf. *notas Frontonis Ducae;* in posteriores vero, *notas eiusdem Cotelerii* pag. 516. ubi plena invenitur Asterii notitia.

(150) In *Bibl. max.* PP. Lugd. 1677. tom. V. pag. 818.

- » rum nunc quoque vos horum institores audite; qui ceu vestes
- » subinde uxores mutatis; qui thalamos tam saepe ac facile,
- » atque nundinarum tabernulas, struitis; qui dotem ac bona du-
- » citis, coniugesque ad quaestum ac negotiationem habetis;
- » qui lev[i] statim offensione, repudii libellum conscribitis; qui
- » in vivis hactenus agentes, viduas plures relinquitis (151). »

Attamen non desunt, qui Asterium de sola quoad torum et habitationem dissolutione exponant. Quod quidem suadere posse videtur 1. ex eo quod nunquam in toto hoc sermone affirmet licitum esse post coniugii dissolutionem aliam ducere uxorem; 2. ex eo quod arguat eos, qui Romanis legibus confisi libellum repudii scribebant, quibus leges divinas opponit dicens: « Si autem Romanis auscultantes legibus permissem esse scortationem (viris), ac crimine vacare existimant, gravem sane errorum errant, ignorantque leges divinas ab humanis nimium quantum distare doctrinis ac placitis 3. Quod de eiusmodi electione a domo disserat: « Laudabo eum, inquit, qui fugerit insidiaticem; qui abruperit vinculum, quod eum aspidi, quod viperae copulavit. Huic enim primus indulget ipse universorum Auctor, tamquam iusto dolore percito, meritoque domus pestem ac exitium domo exigenti (152). » 4. Demum ex eius exhortatione ad castitatem, qua suum sermonem claudit, et ex eo quod pares viros foeminis facit, quibus certe a legibus indultum non erat propter adulterium divortium (153).

(151) Ibid. Ex his verbis non absurde nonnulli colligunt S. Asterium non solos catholicos alloqui, penes quos nunquam viguit, illa praesertim aetate, tanta facilitas in uxoribus commutandis, sed promiscuam alloqui multitudinem, quae constabat etiam paganis et haereticis, praesertim Arianis. Animadvertis etiam debet in sensu, ut aiunt, accommodo pro diversa substrata materia intelligi posse objecta verba: *Exceptis morte et adulterio*, adeo ut priora referantur ad dissolutionem perfectam, posteriora ad dissolutionem imperfectam seu quoad separationem a toro et cohabitatione. Cf. Martorelli op. cit. p. 312.

(152) Ibid. pag. 820.

(153) Cf. Amort. Op. cit. pag. 87.

## §. XVIII.

De S. Hilario Pietaviensi.

Huius S. Patris pro causa sua in medium protulit testimonium Launoius tamquam peremptorium (154). Ast si accurate Hilarii verba expendamus, patebit, ipsum contrariam omnino tenuisse sententiam.

En eius verba ex cap. IV. in S. Matth. n. 22. « *Dictum est autem : Quicumque dimiserit uxorem suam, det illi repudium* etc. Aequitatem in omnes concilians, manere eam maxime in coniugiorum pace praecepit : legi addens plura, nihil demens. Nec sane prefectus argui potest. Nam cum lex libertatem dandi repudii ex libelli auctoritate tribuisset, nunc marito fides evangelica non solum voluntatem pacis indixit, verum etiam reatum coactae in adulterium uxoris imposuit, si alii ex discessionis necessitate nubenda sit : nullam aliam causam desinendi a coniugio praescribens, quam quae virum prostituae uxoris societate pollueret 155). »

Quae verba hunc fundunt sensum : Christus, prout pollicitus erat, hoc documento non solvit legem, sed adimplevit eam perficiens, quatenus libellum repudii abolevit, ac merito pacem cum uxore sua indixit, praeципiens cum ea iugiter permanere. Ita vero eiusmodi cum uxore perseverantiam indixit, ut si quacumque de causa eam repudiaret, se reum constituat adulterii, in quod ob eius derelictionem ipsa incideret, si alteri nubaret. Unicam assignavit causam iustae dimissionis, nempe uxoris fornicationem seu prostitutionem, et quidem dimissionis a toro et cohabitatione. Siquidem hoc in easu iustae dimissionis, si uxor dimissa alteri se copulaverit, sibi soli imputare debet

(154) Sribit enim op. cit. pag. 828. « Periodus tota, quid Hilarius sentiat, facile ostendit. Scripturam intelligit quomodo illa intelligendam se praebet, licere videlicet marito, dimissa propter adulterium uxore, aliam ducere. »

(155) Opp. ed. Maur. Veronae 1750. tom. I. pag. 686.

adulterii reatum, in quem ipsa inciderit, a quo maritus dimitens immunis est.

Iam vero concors haec est, ut vidimus, Patrum doctrina, a qua profecto Hilarius nulla ratione dissentit, quin potius eam confirmat. Hinc merito editores Maurini in nota ad hunc Hilarii locum scripserunt « Qui ex hoc loco volunt Hilarium non modo uxorem adulterii ream dimittendi, sed et alteram ducendi licentiam tribuere, aliud ei attribuunt, quam quod dicit aut sentit, cum maritum uxor adulterae ab illius societate dum taxat absolvat. »

## §. XIX.

De Chromatio Aquileiensi.

Quae de hoc argumento scripsit S. Chromatius, episcopus Aquileiensis, (156) habentur Tractatu IX. in cap. V. S. Matthei ubi praemissis verbis Salvatoris : *Ad duritiam cordis vestri* etc. in hunc modum prosequitur : « Unde nunc non immerito Domminus ac Salvator noster, sublata illa licentia, antiquae constitutionis suae praecepta restaurat. Iubet namque matrimonii castum coniugium indissolubili lege servari, ostendens coniugii legem a se esse primitus institutam. Ipse enim ait : Quod ergo Deus coniunxit in unum, homo non separet. Quo dicto et passivam Iudeorum licentiam, et stultam ac miserabilem Manichaeorum praeceptionem, qui negant a Deo esse coniugia, huius sententiae pronunciatione damnavit, dicens : excepta causa fornicationis uxorem non licere dimitti : aperte demonstrans, eum contra Dei agere voluntatem, qui matrimonium a Deo iunctum illicita divortii separatione te-

(156) De huius sancti antistitis gestis et scriptis cf. Iustum Fontaninum episcop. Coreyensem in *Historia litteraria Aquileiensi*. Romae 1744. libri tres cap. 3. et 4. Nec non Bernard. Mariam De Rubeis *De monumentis ecclesiae Aquileiensis commentario illustratis*. Argentineae (seu Venetiis) 1740. cap. 10. seqq.

merare praesumpserit. Unde non ignorent, quam grave apud Deum damnationis crimen incurant, qui per effrenatam libidinis voluptatem (absque fornicationis causa), dimissis uxoribus, in alia volunt transire coniugia. Quod idcirco secrete impune committere, quia humanis et saeculi legibus id videtur permisum, nescientes, in hoc se gravius ac magis delinquare, quia humanas leges divinis preeferant; ut quod illicitum Deus esse constituit, ideo licitum credant, quia ab homine sit libere permisum. Sed sicuti uxorem caste ac pure viventem dimittere fas non est; ita quoque adulteram dimittere permisum est, quia ipsa mariti consortio fecit se indignum, quae in corpus suum peccando, Dei templum ausa est violare (157). » Hactenus ille.

Ex hac postrema periodo nonnulli contenderunt Chromatium ita de divortio loqui, ac si novum matrimonium, dimissa uxore adultera, contrahi posse existimarit, uti Dupinius (158). Ast Tillemontius ei refragatur dicens S. Chromantium verbis uti evangelicis, quin aliquid praeterea de suo adiiciat, cum forte neque pree oculis eiusmodi quaestionem habuerit (159); refragatur pariter Ceillierius (160), nec non Sixtus Senensis (161), aliquie passim adversus neotericos, qui id ipsum inficiantur (162).

(157) *Sancti Chromatii episcopi Aquileiensis scripta sive opuscula.* Utini 1825. pag. 49. 50.

(158) *Nouvelle bibliothèque des auteurs ecclésiast.* Paris 1690. tom. III. Des auteurs du cinquième siècle, première partie pag. 269. ubi scribit: « En expliquant ce qui est dit dans l'Evangile du divorce, il parle comme s'il croyait que l'on pût épouser une autre femme après avoir fait divorce pour l'adultére. Mais il condamne ceux, qui quittent leur femme pour d'autres causes, et ensuite se remarient, quoiqu'il avoue que les loix humaines le permettent.

(159) *Mémoires etc.* tom. XI. note II. Sur saint Chromace page. 667.

(160) *Hist. générale des auteurs sacrés,* tom. XIII. pag. 86.

(161) *Biblioth. sanct.* lib. VI. annot. LXXXI. ed. Neap. 1747. una cum Milante tom. II. pag. 782.

(162) Cf. Iustum Fontaninum op. et loc. cit. cap. IV. n. IV. et editores. Opp. S. Chromatii Utinens. in praef. pag. XL. seqq.

Sane, ut constat ex istius tractatus lectione, S. Chromatius eum in duas partes dispescit; in priori unice proponit textum Matthaei V. 32. quin ei quidpiam adiiciat. Adeoque de hac parte nihil attinet dicere. In posteriori eos arguit, qui Romanarum legum obtenuit divinam constitutionem de coniugii religione solvebant; quique inde etiam crimen suum augebant, quod leges humanas divinis sanctionibus anteferrent. Iam vero affirmat quidem Chromatius sub finem huius tractatus posse viros adulteras, quae fidem coniugalem violarunt, depellere, non tamen adiecit, illis dimissis, novum posse inire coniugium. Hoc porro necesse foret, ut adversariorum sentiae eum adstipulari diceremus.

## § XX.

De S. Hieronymo.

Doctrina Hieronymi adeo aperta est, ut mirum videri possit Chemnitium aliasque ausos esse eum inter divortii patronos recensere.

Occasionem hi nacti sunt ex iis, quae S. Doctor in epistola ad Oceanum adiecit extenuandi causa gravitatem culpae, quam Fabiola repudiando adulterum maritum, seque cum alio iungendo, admiserat. Ast perperam; ita enim prosequitur S. Hieronymus: « Igitur et Fabiola, quia persuaserat sibi, et putabat a se virum iure dimissum; nec Evangelii vigorem noverat, in quo nubendi universa causatio, viventibus viris, foeminis amputatur, dum multa diaboli vitat vulnera, unum inculta vulnus accepit. Sed quid ego in abolitis et antiquis moror, quaerens excusare culpam, cuius poenitentiam ipsa confessa est? » Refert deinde acerbam ac publicam Fabiolae poenitentiam (163).

Nec minus perspicua sunt, quae scribit in epist. ad Aman-

(163) Ed. Vallars. Opp. tom. I. epist. LXXVII. n. 3. 4. col. 455.

dum presbyterum: « Reperi iunctam epistolae et commenta-  
 » riolo tuo brevem chartulam, in qua haec indita ferebantur:  
 » Quaerendum ab eo, id est a me, utrum mulier, relicto  
 » viro adultero et sodomita, et alio per vim accepto, possit  
 » absque poenitentia communicare Ecclesiae, vivente adhuc eo,  
 » quem prius reliquerat . . . Responde itaque sorori, quae  
 » a nobis super suo statu quaerit, non nostram, sed Apo-  
 » stoli sententiam: *An ignoratis fratres . . . Ergo vivente*  
*viro, adultera erit, si duxerit alterum virum*, et in alio loco:  
 » *Mulier alligata est* etc. Omnes igitur causationes Apostolus  
 » amputans, apertissime definit, vivente viro adulteram  
 » esse mulierem, si alteri nupserit. Nolo mihi proferas raptoris  
 » violentiam, matris persuasionem, patris auctoritatem, pro-  
 » pinorum catervam, servorum insidias atque contemptum,  
 » damna rei familiaris. Quamdiu vivit vir, licet adulter sit,  
 » licet sodomita, licet flagitiis omnibus coopertus, et ab uxore  
 » propter haec scelera derelictus, maritus eius reputatur, cui  
 » alterum virum accipere non licet. Nec Apostolus haec propria  
 » auctoritate decernit, sed Christo in se loquente, Christi  
 » verba sequutus est, qui ait in Evangelio: *Qui dimittit uxo-*  
*rem suam, excepta causa fornicationis, facit eam moechari;*  
 » et qui dimissam acceperit, adulter est: Animadverte quid  
 » dicat: *qui dimissam acceperit, adulter est.* Sive ipsa di-  
 » miserit virum, sive a viro dimissa sit, adulter est, qui eam  
 » acceperit . . . Ergo et ista soror, quae, ut dicit, vim passa  
 » est, ut alteri iungeretur, si vult corpus Christi accipere, et  
 » non adultera reputari, agat poenitentiam: ita dumtaxat, ut  
 » secundo viro, qui non appellatur vir, sed adulter, a tempore  
 » poenitentiae non copuletur (164).

Haec adeo decretoria sunt, ut supervacaneum censem alia  
 eiusdem S. Doctoris adferre testimonia, in quibus eamdem de  
 omnimoda indissolubilitate matrimonii orthodoxam doctrinam  
 inculcat.

(164) Ibid. epist. LV. n. 5. et 4. col. 293 seq.

Operae potius pretium est, subdolas atque contortas Launoii  
 caeterorumque eius asseclarum evasionses praeccludere. Iuxta  
 Launoium « Hieronymi sententia est, ut patet, viri et uxoris  
 » conditionem parem non esse, in eo, quod attinet adulterium;  
 » ac viro liceat, dimissa propter solum adulterium uxore, aliam  
 » ducere; sed uxor, viro propter adulterium demisso, non  
 » potest alteri, quamdiu dimissus vivit, nubere. Atque istud  
 » quod observatione summa dignum est, ecclesiarum magis-  
 » trum dixisse *nusquam*, maritum illum, qui, dimissa prop-  
 » ter fornicationem uxore, aliam ducit, adulterum esse, cum  
 » toties dixerit, uxorem, quae, dimisso ob fornicationem  
 » marito, alteri nupserit, adulteram esse (165). » Ergo si  
 fidem iungamus Launoio *nusquam* S. Hieronymus dixit *ma-*  
*ritum illum, qui, dimissa propter fornicationem uxore, aliam*  
*ducit, adulterum esse*; si illa esset Hieronymo mens, quorsum  
 dixisset in descripto ex epistola ad Amandum testimonio:  
 « Animadverte quid dicat (Christus), *qui dimissam acceperit,*  
*adulter est; sive ipsa dimiserit virum, sive a viro dimissa*  
*sit, adulter est qui eam acceperit.* Quibus verbis eamdem  
 significat esse tum viri tum uxor dimittentis conditionem,  
 ita ut uterque adulter evadat hoc in casu, sive vir sive  
 mulier. » In Epist. vero ad Oceanum « Quidquid viris iubetur,  
 inquit, hoc consequenter redundat in foeminas. Neque enim  
 adultera uxor dimittenda est, et vir moechus tenendus. »  
 Ex quibus patet S. Hieronymum non modo aequivalentibus  
 verbis de viris affirmare quod de foeminis adstruit, sed prae-  
 terea ex viorem potius conditione arguere conditionem uxorum,  
 quae ob adulterium dimissae sunt, adeoque legem evangelicam  
 immediate viros afficere, et, cum par sit utriusque coniugis  
 hac in re conditio, afficere etiam mulierem. Talis est magistri  
 ecclesiarum doctrina, non autem commentum, quod Launoius  
 excogitavit ad eius eludendam auctoritatem.

Idem est ferendum iudicium alterius effugii ab aliquibus

(165) Op. ed. cit. pag. 892. et 893.

in eumdem finem quaesiti, dum aiunt, S. Hieronymum distinxisse inter adulterium probatum et adulterium praesumptum; atque in adulterii quidem praesumpti, sed non probati casu denegasse facultatem novas ineundi nuptias, eam vero concessisse adulterio probato, viris praesertim. Hoc vero paradoxum evincere admituntur illis verbis, quae leguntur in eius Commentar. super Matt. XIX. 9. « *Sola fornicatio est, quae uxoris vincat affectum: immo cum illa unam carnem in aliam diviserit, et se fornicatione separaverit a marito, non debet teneri; ne virum quoque sub maledicto faciat, dicente Scriptura: Qui adulteram tenet, stultus et impius est. Ubi cum que est igitur fornicatio et fornicationis suspicio, libere uxor dimittitur. Et quia poterat accidere, ut aliquis calumniam faceret innocentem, et ob secundam copulam ruptiarum, veteri crimen impingeret, sic priorem dimittere iubetur uxorem, ut secundam, prima vivente, non habeat (166).* » Verum ecquis in adductis verbis deprehendet, a S. Doctore distinctionem fieri inter adulterium probatum et non probatum? Insuper concedi viris dissolutionem quoad vinculum, cum expresse affirmet ita iuberi dimittere uxorem fornicantem, ut secundam prima vivente non habeat? Aut etiam disparitatem inter virum ac mulierem hoc in easu significari, cum aperte contrarium doceat illis verbis: « *Apud nos, quod non licet foeminis, aequa non licet viris: et eadem servitus pari conditione censetur (167)* »

Eodem in pretio habenda sunt, quae alii autumarunt, nimirum S. Hieronymum perinde ac S. Io. Chrysostomum veram suam studio celasse sententiam (168); aut non satis sibi constituisse aut delectatum esse nimium ideis monasticis (169). Haec enim omnia, hisque similia patefaciunt huiusmodi scrip-

(166) Ita Braun cit. Dissert. pag. 55 seq.

(167) Epist. LXXVII ad Ocean. n. 3. col. 453. ed. cit. tom. I.

(168) Ita auct. op. German. Tentamen theolog. statist. nota 683. pag. 188.

(169) Ut Ios. Batz in op. Germ. Harmonia novissim. legum Bavariae circa divortium etc. pag. 43.

tores, qui talia comminiscuntur, haud sibi sincero animo proposuisse veritatem persequi, sed iuxta anticipatam sententiam velle vel invitatos ad se pertrahere, obluctarique iis, qui contrarium docent. Haec perpetua est istorum ars, ut si quaedam obscure dicta videantur, ea illico arripiant ac pro se adueant, ea vero, quae clara sunt, secus ac ipsi optarent, tenebris offundere nitantur.

### §. XXI.

De S. Augustino.

Hipponensem praesulem sibi adversari divortiorum patroni sentiunt ac ulti fatentur; quinimo ipsum veluti primum huius doctrinae assertorem de indissolubilitate coniugalis vinculi, etiam interveniente adulterio, traducunt. Sane Chemnitius audacter asserit, quaestionem hanc post Augustini tempora coepisse horridius disputari, Patres vero eodem Augustino antiquiores, non adeo, inquit, fuerunt asperi, duri, horridi et immanes, ut coniugi innocentem alterum ineundi connubium facultatem denegaverint, sed docuerunt rectius, praestantius et perfectius esse, si etiam ille, qui ab adultera separatus est, vel maneat sine coniugio, vel reconciliatam uxorem rursus recipiat (170). Verum quid senserint Patres Augustino antiquiores ab aetate apostolica ad S. Augustinum usque, ex allatis ipsorum testimoniis abunde liquet. Ideo vero S. Doctorem primum huius doctrinae auctorem faciunt, quod data opera quaestionem hanc omni sub aspectu discusserit in duabus praesertim *De coniugis adulterinis* ad Pollentium libris.

Hic quippe S. Augustinum hac de quaestione consuluerat, ac se in eam sententiam propensum patetfecerat, nimirum posse coniugem innocentem, dimisso adultero coniuge, alteri se copulare: quo sensu se intelligere Apostoli textum I. Cor. VII. professus est.

(170) Examin. conc. Trid. in can. VII. sess. XXIV.

S. Augustinus a cap. I. ad VIII. eiusmodi interpretationem refellit; deinde cap. IX. ita aggreditur praecipuum Pollentii argumentum, quod pariter est Achillis omnium adversariorum evangelicae et apostolicae doctrinae, atque ita dissolvit: « Cur ergo, inquis, interposuit Dominus causam fornicationis, et non potius generatim ait: *Quicumque dimiserit uxorem suam, et aliam duxerit, moechatur*, si et ille moechus est, qui, dimissa fornicante muliere, alteram dicit? Credo, quia, illud quod majus est, hoc Dominus commemorare voluit. Maius enim adulterium esse quis negat, uxore non fornicante dimissa, alteram ducere, quam si fornicantem quisque dimiserit, et tunc alteram duxerit? Non quia et hoc adulterium non est; sed quia minus est, ubi fornicante dimissa altera ducitur.... Quemadmodum igitur si dixerimus: *Quicumque mulierem a marito praeter causam fornicationis dimissam duxerit, moechatur*, procul dubio verum dicimus; nec tamen ideo illum qui propter causam fornicationis dimissam duxerit, ab hoc crimine absolvimus, sed utrosque moechos esse minime dubitamus: ita eum, qui praeter causam fornicationis uxorem dimiserit et aliam duxerit, moechum prouinciamus; nec ideo tamen eum, qui propter causam fornicationis dimiserit et alteram duxerit, ab huius peccati labore defendimus. Ambos enim, licet alterum altero gravius, moechos tamen esse cognoscimus.... Sed si hoc evangelista Matthaeus, quia expressa una specie alteram tacuit, facit ad intelligendum difficile; numquid non alii generaliter id ipsum ita complexi sunt, ut de utroque posset intelligi?» Adductis porro Marci et Lucae textibus parallelis, ita prosequitur: « Qui ergo nos sumus, ut dicamus, est qui moechatur, uxore sua dimissa alteram dicens, et est qui hoc faciens non moechatur? Cum Evangelium dicat omnem moechari, qui hoc facit (171)?» Et cap. XII. « Nam et illud quod etiam secundum Lucam sequitur, *Qui dimissam a viro*

(171) Ed. Maur. Opp. tom. VI cap. IX col 591-595.

» *ducit, moechatur*, quomodo est verum? Quomodo moechatur, nisi quia illa, quam duxit, eo vivente, a quo dimissa est, adhuc uxor aliena est? Si enim iam sua, non alienae miscetur uxori, utique non moechatur; moechatur autem; aliena est ergo, cui miscetur. Porro si aliena est, hoc est, eius a quo dimissa est; *etiamsi propter fornicationis causam dimissa est*, nondum emitentis uxor esse cessavit. Si autem illius esse cessavit, iam huius est, cui alteri nupsit; et si huius est, non moechus iudicandus est, sed maritus. Sed quia non eum maritum dicit Scriptura, sed moechum; adhuc illa illius est, a quo etiam *causa fornicationis* abiecta est. Et ideo quamecumque etiam ipse illa dimissa dicit uxorem, quia cum alieno marito concubuit, adultera est (172).»

Lib. II. excludit S. Doctor difficultates a Pollentio propo-sitas, ut ostenderet adulterium morti esse aequiparandum, quo sensu exponebat illud apostoli: *Mulier alligata est legi, quanto tempore vir eius vivit etc.*; cumque absurdam mentem Apostoli contrariam eiusmodi interpretationem pateficerisset, concludit S. Augustinus: « Haec verba Apostoli totiens repetita, totiens inculcata, vera sunt, viva sunt, sana sunt, plana sunt. Nullius viri posterioris mulier uxor esse incipit, nisi prioris esse desiverit. Esse autem desinet uxor prioris, si moriatur vir eius, non si fornicetur. Licate itaque dimititur coniunx ob causam fornicationis; sed manet vinculum prioris, propter quod fit reus adulterii, qui dimissam duxerit etiam ob causam fornicationis (173).

Cum nequeant adversarii haec adeo perspicua Augustini testimonia eludere, indirecete saltem moliuntur eius auctoritatem hac in re imminuere. Aiunt itaque I. Augustinum ipsum in sua sententia dubium ac anticipitem fuisse, eo quod in hoc ipso de coniugiis adulterinis opere scripserit: « His ita pro meo modulo pertractatis atque discussis, quaestionem

(172) Ibid. cap. XII. n. 15. col. 594.

(173) Ibid. lib. II. cap. IV. col. 406.

» tamen de coniugiis obscurissimam et implicatissimam esse  
 » non nescio. Nec audeo profiteri omnes sinus eius, vel in hoc  
 » opere, vel in alio me adhuc explicasse, vel iam posse, si  
 » urgear explicare (174).» Quo pariter referunt quae S. Pater  
 scripsit in libro *De fide et operibus*: «Et in ipsis divinis sen-  
 » tentiis ita obscurum est, utrum et iste, cui quidem sine  
 » dubio adulteram licet dimittere, adulter tamen habeatur,  
 » si alteram duxerit, ut, quantum existimo, venialiter ibi  
 » quisque fallatur. (175).» Aiunt 2. alibi contrarium docuisse,  
 licere videlicet plenum divortium in adulterii casu, ad quod  
 persuadendum proferunt quod S. Augustinus scripsit in lib.  
*De bono coniugali*: «Qui enim dimittit uxorem suam excepta  
 » causa fornicationis, facit eam moechari. Usque adeo foedus  
 » illud initum nuptiale cuiusdam sacramenti res est, ut nec  
 » ipsa separatione irritum fiat; quandoquidem vivente viro,  
 » et a quo reicta est, moechatur, si alteri nupserit, et ille  
 » huius mali causa est, qui reliquit. Miror autem, si quem-  
 » admodum licet dimittere adulteram uxorem, ita liceat ea  
 » dimissa alteram ducere. Facit enim de hac re S. Scriptura  
 » difficultem nodum, dicente Apostolo, *ex praecepto Domini*  
 » mulierem a viro non debere discedere, quod si discesserit,  
 » manere innuplam aut viro suo reconciliari: cum recedere  
 » utique et manere inupta, nisi ab adultero viro non debeat,  
 » ne recedendo ab eo, qui adulter non est, faciat eum moechari.  
 » Reconciliari autem viro vel tolerando, si se ipsa continere  
 » non potest, vel correcto, forsitan iuste potest. Quomodo  
 » autem viro possit esse licentia ducendae alterius, si adul-  
 » teram reliquerit, cum mulieri non sit nubendi alteri, si  
 » adulterum reliquerit, non video... Quod nequaquam puto  
 » tantum valere potuisse, nisi alienius rei maioris ex hac in-  
 » firma mortalitate hominum quoddam sacramentum adhibe-  
 » retur, quod deserentibus hominibus atque id dissolvere

(174) Ibid. lib. I. cap. XXV. n. 52. col. 405.

(175) Cap. XIX. n. 53. col. 183.

» cupientibus, inconcussum illis maneret ad poenam. Siquidem  
 » interveniente divortio, non aboletur illa confoederatio nup-  
 » talis, ita ut sibi coniuges sint, etiam separati; cum illis  
 » autem adulterium committant, quibus fuerint etiam post  
 » suum repudium copulati, vel illa viro vel ille mulieri. Nec  
 » tamen nisi in civitate Dei nostri, in monte sancto eius, talis  
 » est causa cum uxore. Caeterum aliter se habere iura genti-  
 » lium, quis ignorat, ubi interposito repudio sine reatu aliquo  
 » ultiōis humanae, et illa, cui voluerit, nubit, et ille, quam  
 » voluerit, dicit. Cui consuetudini simile aliiquid, propter  
 » Israelitarum duritiam, videtur permisisse Moyses de libello  
 » repudii. Qua in re exprobatio quam approbatio divortii  
 » magis appetat (176).» Item quod ait *Tract. IX. in Io*: «In  
 » qua responsione, si meministis, hoc ait (Christus): *Quod*  
 » *Deus coniunxit, homo non separet*. Et qui bene erudit sunt  
 » in fide catholica, neverunt quod Deus fecerit nuptias, et  
 » sicut coniunctio a Deo, ita divortium a diabolo sit. Sed  
 » propterea in causa fornicationis licet uxorem demittere, quia  
 » ipsa esse uxor prior noluit, quae fidem coniugalem marito  
 » non servavit (177).»

Verum neque ancipitem se in hac doctrina S. Doctor aut  
 dubium exhibuit in obiectis locis, multo vero minus sibimet-  
 ipsi contrarium.

Etenim adversarii in priori textu ex lib. *De adulter. coniugii*, pro certo assumunt, S. Augustinum nominatim ad quaesitionem de solutione coniugalis vinculi propter adulterium allusisse; attamen, uti patet ex recitatis eius verbis, ipse illa protulit generatim de quaestione coniugii universa, quam nemo negaverit unquam talibus obnoxiam esse difficultatibus, quae nonnisi aegre solvuntur, nec hactenus forte solutae sunt. Materia enim matrimonialis difficilis est iuris utriusque peritis, difficilis moralis disciplinae institutoribus, difficilis Bibliorum

(176) Cap. VII. et VIII. loc. cit. pag. 525 seqq.

(177) Opp. tom. III. n. 2. col. 560 seq.